


docsriver 文川网
入驻商家 古籍书城
在文川网搜索古籍书城 获取更多电子书

〔清〕查慎行 著
周 劭 標點

敬業堂詩集

王遂常

〔下〕



上海古籍出版社

首都师范大学图书馆



21101031

1101031

敬業堂詩集卷四十一

待放集

起癸巳正月，盡六月。

移疾經年，遲遲去國，恭遇聖天子萬壽之期，既隨班朝賀，復申前請。又三閱月，始蒙恩允歸。古人以道去國者，待放于郊，得玦乃去。春秋公羊傳則謂「大夫已去，三年待放」。噫！毋乃太濡滯乎？得玦而去，斯可矣。

韓幹放馬圖次東坡題李伯時所藏韓幹馬七言古詩韻

圖爲同

年薄勺庭所藏，絹本無款。孫少宰北海題其後，謂是韓幹筆。

一如鶴啄長鬣垂，一如狼顧尾撒絲。其一昂頭立而嘶，欲前不前耳卓錐。眼中空闊視八極，跼步尺咫胡由馳。薄言垆者在垆野，絡腦且脫黃金羈。人間皂櫪或老病，天上閑廐誰權奇。攻駒考牧兩無預，造物一聽相雄雌。留官大得閒放意，轂鯨遑問牛何之。吁嗟

乎！隙中過景越千載，畫肉畫骨空毛皮。
東川清絲況寸裂，縱復神駿疇能知。
斯圖卽謂曹
霸可，弟子未必賢于師。

今年擬不作詩復爲友人牽率破戒口占自解

年來百事多頽廢，何必於詩苦用心。
正爾苦心誰復識，堯夫自有打乖吟。

院長湯西厓前輩出示與副相揆公贈答詩索余次和六首

皇華候騎走駉駉，萬里還朝倡和新。
何物堪持比詩境，冰壺玉鑑兩無塵。

好士重開六館開，中間一館是翹材。
春風入座人人愛，只待先生下直回。

第七車中博物餘，承明顧問在星廬。
不知三篋三倉外，可有平生未見書？

白楊巷與青楊巷，多少車前騶唱聲。
何似神仙雙學士，對騎官馬出郊行。
時揆公以副相兼

docsriver 文川网
入驻商家 古籍书城

在文川网搜索古籍书城 获取更多电子书

掌院，故得並稱學士。

文壇宿望與資深，吟徧西垣又苑林。三十年來同調盡，却從少和識孤音。後漢書孔融傳贊：「越俗易驚，孤音少和。」

翩翩和鳴屬兩公，卷阿風入雅音中。枯桐入爨還邀賞，草木終憐臭味同。

題徐去矜侍御日南種菜圖

不費園官送，渾疑老圃家。苗民分匕箸，童子刷烟霞。飽喫三年菜，閒看四季花。還朝無俗物，堪作畫圖誇。

癸巳仲春上下文廟分獻紀事四首

森森老檜上參天，路入橋門氣肅然。齋宿忝隨丞相後，先一日隨太倉相國省牲閱祭品。趨隄

獲在聖人前。元音唱歎餘琴瑟，古器駢羅識几筵。兩度春秋遞分獻，一門兄弟儼差肩。去秋丁祭，家弟嗣璫與分獻之列。

鷺縷翟羽互飛翔，樂舞同時綴兩行。道在夔牆榮北面，禮成盥薦屬東廂。千秋世裔綿吳國，言子舊封吳侯，其裔孫德堅去冬始襲經博。十哲新躋列紫陽。朱子去春躋十哲，配享廟堂。以上兩賢，余分獻之位。到此始知儒者貴，遙遙今古幾升堂。

自堂徂廡又趨階，升降循環往復迴。想像軒懸非一代，摩挲石鼓已三回。二十年前爲博士弟子，十年前釋褐。頭銜分去聲。出資郎下，班次猶煩博士陪。宋祥符中，孫奭上言，釋奠舊禮以祭酒、司業、博士三獻，新禮以三公，近歲止命獻官三員兼攝，請備差太尉、太常、光祿卿三獻。詔可。今至聖前，則大學士行禮，十哲分獻，用翰林資深者二員，本監監丞博士二員，猶隨分獻官後，蓋參用宋時新舊禮也。絕勝恢諧飢曼倩，殿庭割肉早歸來。

題名釋褐幾何時，衰至人嫌拜起遲。奠筭時余拜起稍遲，以致敬也。導引官遽相催迫，故云。位定瞽宗寧敢讓，致齋所序坐，分獻官在太常卿之上。事關籩豆豈無司。明朝尙舉分膳禮，他日誰陳齒胄

儀。白首詞臣稽掌故，盛朝文物古爲師。

二月二十日雷雨之後忽復嚴寒枕上口占

老子慵貪臥，家童起報晴。朝來冰復合，昨夜蟄初驚。寒暖渾難定，陰陽動必爭。庭花經手種，榮悴也關情。

後二日雪

欣欣逢歲閏，靄靄及春陽。早是經雷雨，如何更雪霜。天心寧好殺，物性自多傷。草木如知候，勾尖幸宛藏。出史記律書。

恭祝皇上萬壽詩四章

鳳紀龍飛五十年，周天景運正中天。衆星拱極雲霄上，萬國瞻光日月前。難老祥徵仁

者壽，誕生聖在佛之先。欲知帝力占毗俗，擊壤吹豳徧八埏。

爐香馥馥護楓宸，花甲循環曆象新。玉燭萬年三月節，鴻鈞一氣四時春。關門典曠收羣士，錫福疇多及庶民。黎老祝釐還自賀，兒孫同作太平人。

厚澤深仁物物霑，算從動植到飛潛。日暉風動恩威並，秉鉞垂衣創守兼。久運乾行神倍王，屢辭尊號德彌謙。太和宇宙無疆慶，長願春隨閏歲添。

極盛皇猷冠古今，無涯聖學仰高深。已隆咸五登三業，猶慮堯咨舜做心。天大固知難繪畫，人歡爭欲效謳吟。小臣拜手情尤切，十載蒙恩在禁林。

題石門勞鈞天日邊鼓篋圖二首

文賦行當擬陸機，鈞天年甫二十，故引用少陵詩中事。暫從鼓篋別庭闈。同朝幾輩來相問，五十年前父執稀。尊甫中丞公，甲辰進士，至是恰五十年。

過庭家學本傳詩，都講風流又一時。三百諸生多避席，愛聽匡說解人頤。

山野老人遠來祝萬壽者以千計日覩盛事紀之以詩

長世人多壽，親承異數加。使年踰甲子，問俗及桑麻。跪進觴停輦，歸簪帽有花。賜
酺還賜杖，好向後生誇。

雨後過自怡園看海棠同院長作時余復請假

不記名園裏，辜芳醉幾回。偶逢新雨過，又報海棠開。此地嗟春晚，當時見手栽。勿
辭燒燭看，爲是別花來。香山詩：「七十三翁難再到，今春來是別花來。」

四月朔大雪

大雪灑庭柯，春光九十過。急催花落盡，亂雜絮飛多。燕壘融還凍，鶯吭噤不歌。紛

紛蜂與蝶，爭奈苦寒何。

送同年海天植前輩視學雲南

八千餘里皇華使，二十多年侍從臣。館閣文章天上草，門牆桃李日南春。先聲到處苗風變，公道傳來士氣伸。儘讓同官開府去，好持冰鑑答楓宸。

重過封氏園飲矮松下偕綱菴湘芷俠君潤木作

刺蘼花外矮松前，指點遊踪廿四年。枝亞平行妨翠鬢，杖端摩頂透青天。與誰作伴人先老，閱世如流我獨憐。賣却朝衫充一醉，免教歸欠酒家錢。

再賦古松疊前韻

時聞松子落吾前，小住方知日似年。草色展開三丈地，濤聲捲起四垂天。最宜物外閒

相賞，久在人間絕可憐。莫道如龍難畫得，真龍又值幾多錢。時潤木畫墨松，旁觀有譽樹爲龍者，故戲及之。

從刺藤園步至陶然亭

未覺年衰腰脚頑，意行隨步有躋攀。雨餘天氣清和候，城角人家墟墓間。柏子庭空移白日，荻苗水澗轉蒼灣。此來直與孤亭別，貪得憑欄一晌閒。

壽山田石硯屏歌副相揆公屬和

吾聞陽精之純韞爲璞，白者曰璧黃者琮。兼斯二美乃在石，天遣瓊寶生閩中。壽山山前石戶農，力田世世兼養蜂。採花釀蜜自何代？金漿玉髓相交融。深埋土肉久成骨，亦如虎魄結自千年松。想當欲出未出時，其氣貫斗如烟虹。地祇愛寶惜不得，飛上君家几硯爲屏風。質良材富肌理豐，廣袤徑尺加磨礪。銀河中傾灑漱水，灌頂倒擢崔嵬峯。寒光通透月兩面，高勢噴涌雲千重。長檠夜燒燭焰紅，表裏映徹疑中空。風林片石非爾比，況許

下巖劣品矜芙蓉。朝來得句傳詩筒，語雖紀實工形容。平生嗜好一無癖，而此特爲情愛鍾。吁嗟乎！人間尤物蓋不乏，目所未覩誰能窮。公今獲石石遇公，無心之合欣遭逢。深山邃谷只作几硯視，要使天下稱良工。

循例請封典有作

貶封有例徧簪裾，院吏傳宣到敝廬。一榻春生衰病後，九重恩逮罷官初。絕無功狀虛縻祿，自寫年勞削勘書。慚愧初階叨進級，枉將章服混樵漁。

自怡園曉起即事呈副相

朝來雲出岫，昨日雨鳴溪。杏子落如豆，楊花膠作泥。新巢看燕乳，舊耳聽鶯啼。去年四月，公有曉起聞鶯詩屬和。詩境從閒得，何須苦覓題。

獨坐紫藤花下

俗客何由到，但聞蜂蝶喧。低枝如見就，長穗不勝繁。稍重雨欹架，忽飛風滿園。冗員無處著，東坡詩：「冗士無處著，寄身范公園。」來借紫花墩。

食新筍

朔野無修竹，名園擅辟疆。舊皮留虎豹，昌黎筍詩：「看皮虎豹存。」新角茁牛羊。淪取庖廚潔，饒生匕筯香。一餐真過分，梅聖俞謝韓持國貽筍詩：「今年得此謂過分。」不似在他鄉。

放船至因曠洲

露氣烟光潑眼青，蒹葭影裏見孤亭。藕梢過港又生葉，柳絮逐波多化萍。鶯語忽流何處去，漁歌合向此間聽。老夫大有江湖興，肯讓閒鷗占一汀。

乞長假留別院長揆公二首

北道嚴裝日，院長將屬躡赴口外。西窗剪燭時。兩心多戀戀，分手故遲遲。款曲行藏計，纏綿倡和詩。桑榆收已晚，後會恐難期。

示疾非無疾，藏名亦有名。難窮惟佛理，易足是官情。聚散人誰免，蹉跎我此行。半生知己分，投老荷相成。

雨中發自怡園再呈院長

迴思風雨追隨地，多在園居少在城。草木因公皆可敬，東坡詩：「醉翁行樂處，草木皆可敬。」禽魚與我豈無情。編年集換新題目，署尾牋留舊姓名。從此高吟應寡和，更無人繼老門生。

附院長作

揆 紱

一醉筵前各異程，迢遙沙塞與江城。欲攀征蓋終無計，苦挽歸航似不情。風雨每思償宿願，亭臺還請署新名。從今裂帛湖邊月，長照離人白髮生。

車中遇佟陶菴同年

三年不見故人詩，一笑多成世外期。君自愛閒求退早，我方移疾得歸遲。萍踪浮海相逢地，柳絮隨風欲散時。莫怪下車還久立，老來光景怕臨歧。

吳寶崖以西苑龍棚詞百首新刻見貽兼索題句四首

朝爲百賦暮千詩，敏捷曾聞崔立之。何似吳郎新樂府，一時紙價貴京師。

好譜新聲付樂工，半參商調半參宮。二千八百驪龍頰，併入歌珠一串中。

員嶠方壺咫尺移，太平景物萬年期。丹青繪出殊難肖，輸與文人絕妙詞。時少司馬宋堅齋

奉旨繪圖。

他人才少爾才多，珥筆差堪上駮娑。可惜得官偏落第，不曾名占百篇科。

端陽前二日薄勺庭招諸同年集王園芍藥花下

綠陰十里豐臺路，來趁名園芍藥期。良會轉憐經歲少，自去年以來，久不舉同年之會。好花偏愛閏年遲。江郎一夢才輸錦，小杜三生鬢有絲。珍重故人尊酒意，將歸時節咏將離。

酬別陶菴同年六首

出門袞袞怕風塵，見面睽違動隔春。形跡校疎情校密，可知俱是嬾朝人。

入同珥筆出隨轡，幾載辛勤共跨鞍。今日車中思馬上，皇恩直似五湖寬。

歸期已是一年淹，辭祿能無缺乏嫌。慚愧故人親致贐，拜嘉祇恐或傷廉。

河梁錄別意如何，真有長歌續短歌。不待吾言君自信，傳人一代本無多。

段家橋外木蘭舟，唱和曾同扈蹕遊。却與歸人添別恨，獨吟怕上望湖樓。

君才畢竟爲時用，我老長甘與世辭。汪右軍有辭世帖。聚散升沈渾細事，人生難得兩相知。

題宋蘭暉潯陽送客圖

聊借琵琶寓苦吟，多緣淪落望知音。後來信有商人婦，直被香山賺到今。

題程蒿亭持竿圖小照

已遮西日向長安，尙想臨流把一竿。寄語能詩侯叔迨，求魚沮洳古來難。

晚香長老六十乞詩

紅椒上人年六十，世壽從頭數甲乙。朝來隱几夢青山，過我殷勤約歸日。我今面皺眼昏花，師亦瘦如枯木查。童時觀性依然在，同閱恆河無算沙。

docsriver 文川网
入驻商家 古籍书城

在文川网搜索古籍书城 获取更多电子书

陰雨連綿頗似江南黃梅天氣

乍陰乍晴鳩奪巢，半濕半乾蚓出土。南中五月熟梅天，北地應呼杏子雨。

送蔣樹存出宰餘慶

憶昨領書局，羣英集金鑾。蔣生預校讎，臭味吾芝蘭。趨階或聯步，會食恆同餐。六時數晨夕，三歲離暑寒。書成上御覽，名姓列簡端。聚散夫何常，如沙孰能搏。同儕三十輩，一一爭彈冠。我已病乞身，子行方得官。不以出處易，儼然平生歡。叩我蓬華門，送迎諒蹢躅。谷風有遺棄，責善人情難。古義胡足論，世途良可歎。子今又遠別，迢遞赴花蠻。黔俗我所諳，雁戶雜猴狔。陰多晴日少，霧氣昏漫漫。長吏雖難爲，苗民豈真頑。賚輸況無幾，期會務使寬。訟簡案牘稀，地遐心跡閒。時時弄筆墨，哦咏于其間。亦足以自娛，因之報平安。好音望頻惠，綿邈非關山。

乞歸候旨未得成行寓庭雜蒔草花用以遣日吟成四首

歸心一以動，如馬渴思騁。乃復繫維之，動中反吾靜。于焉寓草木，幽事閒稍領。既栽須有溉，生理視俄頃。未免擾隣家，朝朝汲甘井。

瓦盆列羣卉，紅白非一種。經旬排比開，含意似矜寵。閱人成旦暮，偷負力何勇。取笑桐柏材，十年方把拱。

開亦勿德雨，謝亦勿怨風。榮枯兩適然，了不關化工。化工倘徇物，毋乃與物同。所以老子懷，癡頑若孩童。

京師看花人，汲汲需代置。主少十日情，市多三倍利。方從擔頭買，旋向牆角棄。不念花有根，初爲悅目地。賞新宜置舊，何用發深喟。

次日社集張匠門齋同人皆和余種花詩再疊前韻四首

平生數交遊，湖海浪馳騁。邇來嗜好別，取友亦取靜。與君隣巷居，跬步煩引領。闊

疎輒累月，會合或食頃。一笑兩心同，無波如古井。

君鬚尙鬢鬢，我髮已種種。引諸同調末，推許荷光寵。栽花坐無慘，決去愧不勇。焉能久鬱鬱，而待宰木拱。

草木茁苕穎，好詩來清風。中有元氣存，豈謂屬和工。羣公富揮灑，下筆無雷同。挹彼山下泉，爲余發蒙童。

造物閱古今，生生本無匱。何論材不材，固有利不利。晚容桑榆補，早恐牙蘗棄。願將種花心，移作樹人地。毋使後來者，仍滋慨然喟。

題王石谷爲張超然畫旌節圖

王畫此圖九年始成

張母早喪夫，張子幼無父。却將歿後榮，報答生前苦。有鹿不觸墻上松，有鼠不穿墻中土。天生異類猶多感，孰謂人情不如古。王君作畫踰九年，此事此圖皆足傳。我詩豈獨

稱子孝，亦使後來知母賢。

去夏手植盆榴二本今年一枯一榮有感而作

庭下兩盆榴，經春謂已萎。其一雨忽生，病夫眼雙洗。枝端抽綠葉，葉底粲紅蕊。蕊綻復吐花，花殘旋結子。依然還舊觀，去聲。慰我岑寂裏。生存日向榮，死者爲薪矣。有情兼弔賀。感歎爲賦此。

院長貽嶺南椰子

椰子產番禺，瓠垂大如斗。其皮堅以韌，既剝且難剖。誰致越王頭，齊民要術云：「椰子其俗謂之越王頭。」不脛而北走。微凹陷兩目，鑿竅通一口。轉側初有聲，俄傾半升酒。東坡椰子冠詩：「半升僅漉瀟明酒。」閒吟出既醉，義愧餉師友。梅聖俞謝李獻甫餉椰子詩：「我獨愧先生，饌致崇師友。」

林鹿原餉武夷茶

頭綱拜賜吾何有，細色徒聞馬上誇。何法商量好消渴，都籃分得大窠茶。梅聖俞漸茶詩。
「大窠有壯液，所發必奇穎。」

木本金銀花十四韻

本是沿籬蔓，今成傍砌栽。瘦根形促縮，短梗狀堆厖。鳥爪拳筋立，蛇皮換骨來。忍冬經凜烈，入夏應恢台。長乳層層發，幽花對對開。雛鶯飛閃爍，小鶴舞毵毵。蝶粉悠揚墜，蜂鬚颯灑迴。金銀分老稚，黃白變胚胎。最好清含露，尤宜薄戰雷。痛須芟冗葉，惜勿剪條枚。就影移書案，留香泛酒杯。資生無秘術，入藥卽良材。病檢醫方熟，閒從物性推。不貪能識氣，衆眼漫相猜。

庭西牽牛子新苗競發喜成十韻

手種牽牛子，根株粒粒成。勾尖看乍破，兩葉喜先萌。驗長論分寸，爲時閱晦明。立苗防細弱，插竹與扶檠。遂有纏綿意，偏多附麗情。疾風從偃仰，猛雨賴支撐。地力隨肥

瘠，天機示發生。幾時花逞豔，連日蔓交榮。寓目聊充玩，消閒亦強名。料他秋爛熳，我已赴歸程。

和張日容嘲薜荔二十韻

薜荔爾何物，纖微孰比方。胡然纏宇下，只合繚崖旁。跂跂工緣壁，離離巧翬牆。性因柔善附，地以瘠爲良。松柏寧勞施，絲蘿故自張。龍鱗移不易，宋史：「李彥發物供奉，大類朱勳。如龍鱗薜荔一本，輦致之費，踰數萬。」蛇蚶斷無傷。及見縈根密，俄驚引蔓狂。嫩莖繩絞繳，大葉羽披猖。山鬼依棲暗，佛典呼餓鬼爲薜荔。湘君結託荒。罔帷憐屈宋，九歌：「罔薜荔而爲帷。」靡席笑班揚。甘泉賦：「靡薜荔而爲席。」雜蕙紉爲佩，輸荷緝作裳。寒枝頻颭影，貫藥罕聞香。雜騷：「貫薜荔之落葉。」好補青藤援，休侵白玉堂。移文果芳杜，北山移文：「豈可使芳杜厚顏，薜荔蒙耻。」作賦混蓀萋。張衡南都賦：「草則薜荔蕙，若薇蕪蓀萋。」誰遣臨書幌，兼能罩筆牀。有時經雨潤，逐日領風涼。梢自隣家放，陰留夏景長。卷簾交竹翠，曳杖點苔蒼。大抵詩騷意，多從諷諭將。勿嗤吟小草，中有好篇章。

晚香長老贈桃枝竹杖

六尺桃枝杖，將歸荷見投。健添居士足，高出老僧頭。與鶴誰先到，爲龍寧久留。撥開塵土窟，遲爾入山遊。

同人集棗東書屋分賦二首

春偷桃杏妍，夏竊芙蓉豔。秋榮雜桂菊，冬至亦時斂。樂子之無知，多將四時占。月季花。

小小黃金花，媚人如自獻。聊陪今日賞，適我他方願。衆醉敢獨醒，不勞持盞勸。金盞花。

汪陞交郡丞屬題負米讀書圖時將赴任潮州即以贈別

汪子客京華，氣豪心悒快。高堂有母在，恆結白雲想。皇天憐斯人，得舉甫一上。南宮輒唱第，盛事快探掌。早知給舍官，不及州邑長。題輿行佐郡，得祿猶逮養。潮海萬里

程，翩然捧檄往。過家拜白髮，喜氣春盎盎。却憶負米時，悲喜異今曩。平生讀書力，篝火依績紡。食報理必然，問言受如響。丹青非苟設，風義行可廣。題作贈行篇，披圖愜神賞。

題故汝州太守潘君畫像

士當未遇時，往往慕好爵。及乎嬰世網，又想田園樂。田園豈不好，世網多被牽。興罷乃徑歸，斯人得非仙。廿年客京洛，未識斯人面。山光竹影中，髣髴如相見。

送同年劉大山應召赴行在三首

且喜南冠不到頭，復趨幄殿侍宸旒。恩威天大殊難測，去住身孤可自由。沙澗草香知躡過，林蹊月黑見螢流。識途老馬今閒放，歷歷從君話舊遊。

行行莫慮出關遙，司馬臺東景色饒。禾黍連塍無棄地，松杉夾岸有浮橋。霜收野果丹砂實，雨剪山蔬翡翠苗。一段閒情知不乏，也應問答到漁樵。

弱羽迴翔又一時，鍛禽來拂鳳皇池。重回蓬島游仙夢，別擬山莊應制詩。眼望青冥行得路，心憂白髮見無期。臨歧直是難爲別，二十年來兩故知。

畫叉

我有古玉器，裹諸片青氈。炯如一鈎月，映出初三天。纖纖銳兩頭，弓勢未扣弦。下連徑寸靶，中竅外規圓。愛惜徒手摩，致用無由緣。昨得桃竹杖，肌理細且堅。命工稍斲削，冠玉于其顛。呼之曰畫叉，古製想當然。東坡昔居黃，剩有掛壁錢。持叉日取百，月費猶三千。我今已鐫俸，仰屋方高眠。夫豈有餘資，貫穿梁上懸。又成等無用，一笑仍棄捐。何如刻作鳩，扶我歸農田。

題王石谷山水四首

浮嵐暖翠望重重，幾道清泉出古松。知有僧樓尋不到，似聞一杵隔雲鐘。

水匯山環去復回，林端無徑不梯苔。石梁果與天台接，可許人間驄馬來。

想當潑墨目無前，董巨源流却井然。天下溪山皆粉本，空中結構是雲烟。

朱瑤晚輩今多少，真蹟尤須愛惜看。見說山人年八十，白頭重畫此圖難。

留別潤木即次弟送行原韻四首

誰能問舍更求田，車自今懸室早懸。久病我忘官爵好，同朝人羨弟兄賢。魚隨水退先歸壑，雁逐雲飛尙各天。時德尹嶺南未歸。若是登真須拔宅，良常何敢獨爲仙。

幾夜連牀聽雨聲，却教離恨此中生。貧思飽暖原奇福，老戀桑榆亦至情。出處多歧非意料，去留無累稍身輕。只愁五十平頭客，婚宦何時了尙平。弟今年五十矣。

指點林廬眺望餘，曉隨門鵲暮棲鴉。桐爲先世成陰樹，池上梧桐，先君子手植，二十年前已合抱。宋人稱韓子華兄弟爲「桐樹韓家」。桂是吾家及第花。吾家廳事前銀桂五株。自癸酉以來，每逢科詔，兄弟子姪輩有獲雋者，必發金花一枝爲先兆，歷歷不爽。屋後籬疎須補竹，牆西地瘠想宜茶。得歸已乏躬耕

力，種植書中課有加。

事兄慚愧竟如師，至性怡怡實在斯。何日始酬借隱願，向人羞乞買山資。夢餘得句憐靈運，膝下成名愛阿宜。杜牧與姪阿宜詩：「連年掇科第，若摘領下髭。」時五姪克紹新舉京兆，故云然。此外升沈皆分定，吾言雖淺要尋思。

留別詩社諸同人次張匠門見送原韻

去住何關此一官，衰年只別友朋難。烟霄過眼看如霧，草木論心臭比蘭。身在夢中誰獨覺，事當局外每長歎。是間著我初無謂，獅子林中一野干。禪宗語錄有一野干隨逐獅子，終不成獅子之語。

白頭白盡想巢南，早署菴名未有菴。朝跡已收雙屐在，歸裝猶累一僮擔。高僧瓶鉢原初約，老圃桑麻豈腐談。多謝故交頻戀別，尙容諧謔互相參。

匠門以瓶蓮十二韻索和次答

脈脈凌波質，朝來帶露攜。出瓶看蕊綻，照眼得花齊。長養仍資水，清幽更洗泥。畧教分向背，初不競高低。欲語殊多態，何愁自少啼。豔將同洛浦，愛豈獨濂溪。有客尋池上，無魚戲葉西。依稀能忍笑，綽約好防迷。顧影移秋蝶，分香夢夕鷺。暑颺迎澹澹，涼雨避淒淒。立傍屏風鷺，談親麈尾犀。涉江吾擬采，先與報箋題。

題吳寶崖在山讀書圖即送其出宰在平

無事飲犀首，亡何飲袁絲。飲之爲功固不細，阮能罷哭陶忘飢。張芝李白大暢此中趣，可以狂草可以詩。逃名混跡靡不取，獨於從宦非其宜。何況邑宰寄民社，設遇煩劇尤難爲。吾黨吳生性耽酒，其人磊砢而英奇。今將行作吏，得縣古名在。有山袞袞東南陲，有水雷雷西北馳。中間曠衍百餘里，廚傳四走當衝達。似聞齊俗夙健訟，邦治邦法難兼施。書生習氣要一變，嗜好勿使旁人窺。仕而優則學，二者恆相資。公餘讀書良有味，絕勝千鍾百榼痛飲誇淋漓。勸君可止則徑止，未能遽止請損之。贈行實關朋友義，吾言雖戲

docsriver 文川网
入驻商家 古籍书城

在文川网搜索古籍书城 获取更多电子书

庶可以箴規。

諸君爲余作桃枝竹杖歌余亦自賦一首

勞不得及奔馬，逸不得乘安車。飛不能羣衆鳥，游不能隊潛魚。無端人趨我亦趨，倉卒一蹶誰當扶。七尺之杖六尺軀，聖恩寬大容田廬。歸與歸與，吾與爾俱。杖國雖不足，杖鄉已有餘。

苦熱

不辭河朔飲，酷暑竟難逃。高屋同炊甑，輕容劇緼袍。石欄乾迸火，松柱液流膏。嗟爾巢棲者，多應厭羽毛。

題莊書田笠屐探梅圖

杜家亦有笠，謝家亦有屐。何必眉山翁，區區擬其跡。身挾冰雪骨，胸貯冰雪文。但遇梅花開，入山尋白雲。白雲舊在題詩處，畫裏溪山能久住。君今笠屐且閒拋，借與歸人作遊具。

仇山村詩翰一卷乙丑秋於竹垞寓齋見之借故友魏禹平題名

其後未幾此卷歸吾鄉高文恪公又二十九年癸巳公之孫礪

山攜至京師屬余題句存歿之感愴然于中聊附數言以志歲

月

四百餘年翰墨新，流傳重是宋遺民。論詩正爾空當代，展卷渾如遇故人。世閱古今雙轉燭，事關存歿一傷神。先公手澤依然在，肯使桓廚贗亂真。

題鄭寒村爲魏仿韓畫棲鶴圖二首

鳧雛鴈子影參差，簞羽羣窺浴鳳池。爭及寥天秋一鶴，巢松獨占舊高枝。